

諦閑法師  
講錄之一

圓

覺

經

講

義

上海佛學  
書局  
印行

一 之 錄 講 師 法 閑 諦

義 講 經 覺 圓

冊 一 全

中華民國二五年三月七版發行

◎每册定價洋三角五分

(外埠酌加郵匯費)

述 疏 者 諦 閑 法 師

校 訂 者 佛 學 編 輯 部

出 版 者 佛 學 書 局 表 代 沈 彬 翰

印 刷 者 天 星 久 記 印 刷 公 司

愚園路一五四號 電話三五五二四

總 發 行 上 海 佛 學 書 局

分 發 行 佛 學 書 局 分 局

(一)上海：麥特赫司脫路中 (二)上海：閘北新民路國慶路口

(三)上海：望平街有正書局 (四)長沙：玉泉街七十號

(五)北平：東四南大街 (六)杭州：西湖龍翔橋

(七)福州：下南路二四號

分 銷 處 各 埠 佛 經 流 通 處

# 圓覺經講義序

三藏十二分教。能詮所詮。千派萬別。而同歸於一。一者何。一如來淨圓覺心也。無染。謂淨無漏之謂圓。無無明之謂覺。合淨圓覺三。而爲如來妙明之真心。亦爲衆生同具之本體。即皆心迷體者。起悟進脩之不二妙門也。然而脩多羅中。求其直指此一妙門。破二障而除四攝。攝五性而被三根。機無不投。義無不顯者。惟一圓覺了義經。雖然。末世衆生。障深業重。讀誦已鮮。何論受持。如目盲人。對日月輪。雖光照大千。亦熟視而無所覩焉。迺有乘大願船。擊大法鼓。教以凡夫之所迷者。迷此賢聖之所脩者。脩此無上法王之所證者。證此智無不照。理無不彰。語必透宗。義皆顯體。揭真性而示真脩。提挈流浪生死衆生。一一導歸如來大圓覺海中。其惟我

諦公大師乎。大師秉止觀之法印。澈佛祖之心源。慨大法之沈冥。憫衆生之苦惱。於是纘靈峯遺志。演暢宗風。繼圭峯弘文。別出手眼。長途跋涉。而振錫於上都。暑汗紛披。而焦音於法座。講演歷兩閱月之久。成圓覺經講義數十萬言。其間一科一判。一句一味。一色一香。無不從無上法王大陀羅尼門中。自在流出。且以士夫積垢之深也。研教乘者。則除煩惱之障。或猶易於所知。不得

意者。則拒妄念之生。又如以石壓草。大師曰。所知本非障。道在不執而已矣。妄念不必除。道在不爲所轉而已矣。毘笈摩藥。拔諸惑箭。真濟世之醫王也。然而惡緣旣衆。塵事方殷。三學不易齊脩。四依又難恆值。大師復惻然愍之。而教以念佛法門。其始也。以淨念治其染念。其繼也。以一念冥其雜念。塵想銷融。則不止之妙止也。佛號分明。則不觀之妙觀也。如是念茲在茲。至於念而無念。無念而念。空有雙超。理智一如。則卽空卽假卽中。不知不覺。而入平等本際。圓滿十方。神通大光明藏。於不二鏡。現諸淨土。豈非不思議解脫也哉。凡此所談。無非妙諦。則又大師於講義外。稱性發揮。應機開示者也。與蔣子顯覺。黃子顯琛。日侍講席。耳無停聽。手不停書。錄成兩卷。亦不下數十萬言。盛矣哉。此法會也。如大火聚。近之則立化根塵。如清涼池。入之則頓除熱惱。吾知護法筵者。上則有天龍八部。沾法雨者。下逮於畜鬼三塗。蓋法音冥契乎佛心。斯佛力徧彌於法界。理無或爽。信而有徵。感應道交。千載一時矣。嗟乎。芸芸衆生。漂流業海。迷途久闇。今則導以破闇之燈。幻念緣塵。今則授以照塵之鏡。所願離圓覺之名相。悟圓覺之本元。對鏡而念念知宗。隨緣而心心契體。空亦無寄。豈墮名言。有復何妨。當知幻化。惟能單提夫一念。念念洪名。自不被轉。於六根根根妙用。無庸測度。祇廡脩行。極願深同。登極樂矣。於是隨諸會衆。散諸華香。恭敬供

養信受奉行承。大師命而述其要略如此。更願持此法音。徧滿十方。盡未來際。與無量衆生。同深悲仰。共證圓明。庶幾不負我。

佛度世之恩。而滿。大師說法之願也歟。

民國七年夏歷六月菩薩戒弟子江寧江。杜法名妙煦熏沐稽首謹序。

# 大方廣圓覺脩多羅了義經講義卷上

四明觀宗寺沙門諦閑講疏

先講題有五支略說

例釋此經有五重玄義。一釋名。二顯體。三明宗。四論用。五判教。釋此五重有通有別。通則七番共解。別則五章各釋。例如利鈍。須廣略二門也。言七番者。一標章。二生起。三引證。四觀心。五料簡。六開合。七會異。標章令易憶持。起念心故。生起使不雜亂。起定心故。引證經文佛語。起信心故。觀心卽聞卽行。起精進心故。後三起慧心故。起五心。成五力。七覺調平。入正成因。冀得三解脫果故。

別釋分五。初釋名。分二。初就經中佛定五名彰存略。

按經中佛自定名有五。一云。此經名大方廣圓覺陀羅尼。今存五字。略去三字。以五顯三密。顯能攝密故。二云。亦名脩多羅了義。此名全存。以脩多羅乃大藏之都名。了義是顯了之真義故。三云。亦名秘密王三昧。此名全略。以王三昧是密意。只可心通。難以言傳。以顯離言說相故。四

云。亦名如來決定境界。此名亦全略。意謂如來決定境界。唯佛與佛。乃能知之。非下地菩薩可測。以顯離緣相故。五云。亦名如來藏自性差別。此名亦全略。意謂如來藏中差別之相。衆生本來具足。聖不增。凡不減。數若恆沙。言不能盡。若假言說。說亦徒勞故。大藏諸經。或佛說時便自定名。如法華金剛之類。或佛滅後絕集者立名。如彌陀入楞伽之類。今經佛自定名有五。而翻譯略三存二。大疏云。事周理盡。須建五名。取要標題。且存兩號。其旨深哉。

二就經題通別諸字正解釋分二。初合論通別有四。初約一化論通別。

大藏中一切經典。皆有通別二名。教行理三。皆論通別。且如今題。大方廣等十字。名異衆典。故教別同名爲經。故教通。依教起行。爲行不同。從一行乃至無量行。故行別。會同常樂。故行通。理雖無名。因門名理。理隨于門。四教十六門入理。故理別。門隨于理。理本無二。故理通。

二約一經論通別

始自。是終至奉行。一部文辭。能詮相異。故教別。所詮性同。故教通。頓漸圓修。三觀二十五輪。各異。故行別。同成妙觀。故行通。行行各具全理。故理別。一行全理融攝。諸行。故理通。

三約一題論通別

大方廣卽理。圓覺謂圓照清淨覺相卽行。脩多羅了義卽教。對於經字任運有通別意。

#### 四約一字論通別

首云大字。梵語摩訶。具含三字。華云大多勝。大卽理。多卽行。勝卽教。理性無邊故稱大。行門無數故稱多。教相高廣故稱勝。以理大故教行亦大。行多故教理亦多。教勝故理行亦勝。一字具無量義。一一義中義復無量。一字尙爾。况一題。况一經。况一切經耶。

#### 二分釋通別分二。初釋別名又二。初簡定

一切諸經。別名無量。舉要言之。不外七種。一單人。二單法。三單喻。四人法。五人喻。六法喻。七人法喻。所謂單三複三具足一也。單人如佛說阿彌陀經。單法如摩訶般若經。單喻如梵網經。人法如藥師如來本願功德經。人喻如菩薩瓔珞經。法喻如妙法蓮華經。人心喻如如來師子吼。一乘方廣經。略指如此。餘可類推。

#### 二正釋分三。初釋大方廣又三。初約心法。二約佛法。三約生法。

夫心佛衆生。三無差別。無差別性。卽是圓覺妙性。此之覺性在聖不增。在凡不減。一性一切性。一切性一性。何須作此三釋耶。特以性德在纏。人莫能曉。如暗室中寶。誰能知者。故必約佛界。



三德以明其致。而昧者又獨讓能於佛。故又約九界三性以驗其同。十界並陳。理事悉等。殊不知事理兩重三千。同居一念。而又嫌佛法太高。衆生法太廣。故須約現前之心。以識其要。若果知心佛衆生。三無差別。則言言見諦。句句知宗。爲不了者。姑作三翻講說。今初。

此大方廣三字。直指吾人現前一念心性。全彰一經所談之理體也。大者常徧義。從體得名。非對小言大。若大外有小可對。非真大故。亦非先小後大。以先小後大。非本大故。意謂吾人現前一念心性。實無方隅。亦無分劑。無前無後。並無時劫。豎窮橫徧。當體絕待。不可思議故也。經云。覺性徧滿。圓無際故。當知六根徧滿法界。根徧滿故。當知六塵徧滿法界。如是八萬四千陀羅尼門。徧滿法界等。皆直指現前一念。當體常徧。無欠無餘。故名曰大方者。法則義。從相得名。以吾人現前一念心相。相卽無相。無相不相。故能不變隨緣。隨方取法。一一皆能任持自性。規生。物解。謂聖凡乃至蠢動含靈。無不全具。雖流浪生死。受種種形。而此心性。未嘗少欠。故曰任持。設使返流得源。背塵合覺。最初雖因知識開示。然其知解。從覺性生。如水土之潤生穀麥。芽芽從種生。不由水土。經云。圓覺流出清淨眞如。菩提涅槃。及波羅蜜教授菩薩等。此卽指現前一念心相之方法也。故名曰方。廣者多博義。從用得名。言吾人現前一念之心性。本有過恆沙之

妙用。潛興密應。無有窮盡。此一用同於覺性。無有邊際。無有分限。經云。圓覺淨性。現於身心。隨類各應。卽指有情無情。色空明暗。乃至一毛一塵。無非圓覺妙性之所應現。故經云。無邊虛空。覺所顯發。覺圓明故。顯心清淨。心清淨故。四大六根十二處十八界二十五有清淨。指六凡法界。是覺性應現也。如此乃至十力四無畏十八不共法三十七助道品八萬四千陀羅尼門一切清淨。指四聖亦覺性應現也。如是等義。卽指現前一念之妙用。故名曰廣。善讀經者。能向此三字中。識取自心。則無上寶王。不求自至。善觀心者。能向一介爾心中。識取妙理。則無邊法藏。觸處洞明。故約心法釋也。

二約佛法釋。夫心法圓具。何所不周。以迷強不知。更觀果德。驗果知因。令自薦取。非謂心外更有佛法也。復有三意。一示了真本淨。

經云。一切衆生。種種幻化。皆生如來圓覺妙心。猶如空華。從空而有。又云。末世衆生。應當遠離一切幻化。遠離心故。心如幻者。亦復遠離。遠離爲幻。亦復遠離。離遠離幻。亦復遠離。得無所離。卽除諸幻。觀此可見一真之體。原無一物。只消了得真體本淨。萬境如幻。則當下遠離。本體如原無餘欠。所以如來因地脩圓覺者。知是空華。卽無輪轉矣。如是則體相用三。本自圓成。體

則離過絕非。卽法身德。相則豎窮橫徧。卽般若德。用則具足恆沙。卽解脫德。故稱大方廣爲佛果之三德也。

二示達妄元空

經云。末世衆生。欲求如來淨圓覺心。應當正念。堅持禁戒。先依如來奢摩他行。晏坐靜室。恆作是念。我今此身。四大和合。如其四大各離。身在何處。卽知此身。畢竟無體。和合爲相。假名爲身。進觀此心。但因假合。妄有六根。六根四大中外合成。妄有緣氣。於中積聚。似有緣相。假名爲心。觀此可見身心皆幻。世界原無。身世既無。萬法安有。故稱之曰達妄元空。何以故。虛空性故。常不動故。如來藏中。無起滅故。無知見故。如法界性。究竟圓滿。徧十方故。此卽所謂大方廣是佛果之三德也。

三示頓悟成佛

此意承上二科而來。謂一切衆生。本來是佛。盡大地是個常寂光。祇因衆生一念不覺。不了真體本淨。妄想元空。於無生中。妄見生滅。所謂一翳在目。空華亂墜。如經云。譬彼病目。見空中華。及第二月。殊不知空本無華。病者妄執。乃至由此妄有輪轉生死。故名無明。不了此無明者。非

實有體。如夢中人。夢時非無。及至於醒了。無所得。所以如來因地脩圓覺者。知是空華。卽無輪轉。非無謂也。吾人若能了真本淨。則內不住空。達妄元空。則外不滯有。空有雙超。眞常獨露。靈心絕待。則現前身心。皆爲幻垢。垢相永離。十方清淨矣。經云。末世衆生。證得諸幻。滅影像故。爾時便得無方清淨。又云。一切實相。性清淨故。一身多身。乃至十方衆生。圓覺清淨。一世界多世界。乃至盡於虛空。圓裹三世。一切平等。清淨不動。始知衆生本來是佛。生死涅槃。猶如昨夢。前所謂衆生是佛。盡大地是個常寂光者此也。大方廣卽自心之體相用。乃佛果之三德。可以意知。不俟多贅。

### 三約生法釋

夫圓覺妙性。含生本有。雖迷悟天淵。而體用悉皆平等。故須就衆生三障。可以點示三德。令知演若達多。縱未歇狂。頭原不失。言三障者。一煩惱障。見思塵沙無明。障三菩提。二業障。謂惡業善業有漏無漏。及出假神通。非有漏非無漏業。障三解脫。三報障。同居分段生死。方便實報變易生死。障三涅槃。然三惑卽三菩提。何以故。煩惱性卽菩提性。性本無二。離菩提性。無煩惱故。如離日無翳。二業卽三解脫。離解脫性。無別業故。如離手無拳。三土生死。卽三涅槃。離涅槃性。

無生死故。如離空無華。故曰煩惱卽菩提。菩提是相大。結業卽解脫。解脫是用大。生死之苦卽法身。法身是體大。須知此衆生法。卽是心法。亦卽佛法。非謂生法外別有心法。佛法亦非謂佛法外別有心法。生法。是故於一衆生法中。具見一切衆生法。一切佛法。一切心法。無非大方廣法者。一佛法。一心法。亦爾。故經云。心佛衆生。三無差別。不我欺也。釋大方廣竟。

二釋圓覺

圓者滿足周備。此外更無剩法。所謂无欠无餘。覺者虛明靈照。无諸分別想念。所謂絕思絕慮。若單言覺者。如起信論云。所言覺者。謂心體離念。離念相者。等虛空界。无所不徧。法界一相。卽是如來平等法身。依此法身。說名本覺。故知此覺。非離凡局聖。非離境局心。心境不二。凡聖一如。故加之一圓也。故經云。涅槃昨夢。世界空華。衆生本成佛道。又云。无始幻无明。圓覺心建立。幻從諸覺生。幻滅覺圓滿。又云。一切衆生。皆證圓覺。據此前後經文。雖爲衆生本證。實由幻滅始圓。不假幻脩。无由克證。故曰一切菩薩。應當遠離一切幻化。心如幻者。亦復遠離。得无所離。卽除諸幻。譬如銷金鑛。金非銷故。有雖復本來金。終以銷成就。一成真金體。不復重爲鑛。若能了此心。然後求圓覺。佛答文殊。開口便云。无上法王。有大陀羅尼門。名爲圓覺。流出一切清淨。

眞如。菩提。涅槃。及波羅蜜。教授菩薩。一切如來。本起因地。皆依圓照清淨覺相。永斷無明。方成佛道。故知衆生理證。如來究竟證也。覺則始終不一。圓亦生佛永殊。故云一切如來妙圓覺心。本無菩提。及與涅槃。亦無成佛。及不成佛。無妄輪迴。及非輪迴。但諸聲聞所圓境界。身心語言。皆悉斷滅。終不能至彼之親證。所現涅槃。何況衆生。有思惟心。測度如來圓覺境界。須知衆生圓覺。與諸如來圓覺。不得同年語也。經云。一切衆生。欲泛如來大圓覺海。先當發願。勤斷二障。二障已伏。卽能悟入菩薩境界。若事理障。已永斷滅。卽入如來微妙圓覺。滿足菩提。及大涅槃。此卽始終不一。生佛永殊之明證也。釋圓覺竟。

### 三釋脩多羅了義

脩多羅三字。乃大藏之都名。了義者。當經之別目也。意顯此經。於脩多羅藏中了義之經也。梵語脩多羅。古師翻爲契經。有通別二說。通者佛所說教。總名脩多羅。別者經名脩多羅。律名毘奈耶。論名阿毘曇。今言脩多羅。分明的指經藏。簡異律論二藏之名也。契有二義。一者契理。謂妙符中道。二者契機。謂巧合機心。經如下釋。正翻爲線。線能貫華。經能持緯。此方不貴線。故存經稱。然天竺聖教。皆稱爲脩多羅。故梁攝論譯爲聖教。今于經上加一契字。則雙含二義。俱順。

兩方。故佛地論云。契者契理契機。經者能貫能攝。意顯聖人言教。能貫穿攝持所應說義。以投所化衆生心故。題中于脩多羅下。續以了義二字。意顯此經于經藏中。乃大乘了義之經也。簡異不了義經故。不了義經。謂小乘教聲聞藏攝。了義經者。謂大乘教菩薩藏攝。大乘復有了與不了。謂有大乘人。雖行六度。悲智兼脩。而定說三乘不一。亦非了義。若會歸一極。以玄爐陶于羣像。智海總于萬流。無二無三。無不成佛。中道理觀。不共二乘。方爲了義。謂決擇究竟顯了之說。非覆相密意含隱之談。然諸經中。何爲了義。不了義之別。寶積經。佛答文殊。舍利弗言。諸經中說勝義爲了義。說世俗爲不了義。說煩惱業盡爲了義。說煩惱作業異於涅槃爲不了義。說生死涅槃无二无別爲了義。說厭生死苦趣涅槃樂爲不了義。據諸經說了義行相。皆與今經相當。此經從始至終。无不顯了。直破差別之相。五性斷證。總屬輪迴。令成了義宗旨。故特標脩多羅了義之名。如法華獨得妙名。良有以也。

二釋通名又二。一正釋經字

上十字乃一經之別目。此經字是諸部之通題。具云契經。卽梵語脩多羅也。謂上契諸佛妙理。下契衆生機宜。若但契理而不契機。如俗典雅訓。非經也。但契機而不契理。如牧曲樵歌。亦非

經也。今言經者。不惟契理。亦能契機。故復次。梵語脩多羅。具含五義。一者法本義。謂佛知一切法。皆不可說。以四悉檀因緣而有言教。作世界說。卽爲教本。作爲人對治二說。卽爲行本。作第一義說。卽爲理本。故含法本義也。二者微發義。佛用四悉檀起教。巧妙玄辭。從微至著。靡所不詮。是則文義漸顯。開發初心。初中後善。圓滿具足。故含微發義也。三者湧泉義。此從譬發明。謂妙泉湧流。滔滔无竭。佛用四悉檀說法。文義无盡。法流不絕。津潤萌芽。三草兩木。一地所生。皆得增長。故含湧泉義也。四繩墨義。此亦借喻顯義。如世之木石匠人。以繩墨能裁邪曲。佛用四悉檀說法。裁愛見之邪曲。令發眞見。無漏正道。故含繩墨義也。五結鬘義。此亦借喻顯。結鬘者。卽是縷穿於華。不令零落。佛用四悉檀說法。詮諸法相。赴緣皆無漏失。又華鬘能嚴飾身首。佛以正教莊嚴行人。普令一切。悉皆愛敬。故含結鬘義也。此土諸書。旣無含此五義之言。故用經字以代之。佛地論只有二義。一者貫穿義。謂貫穿所應說故。二者攝持義。謂攝持所化生故。此方訓爲四義。一者法義。謂十界同遵故。二者常義。謂三世不易故。三者徑義。謂修行路徑故。四者典義。謂攝生定典故。舉要言之。乃千聖之恆規。百靈之良軌。迷途之寶炬。佛燈之後焰。故稱經也。



二歷法明經

蓋佛住世時。金口宣揚。聽者得道。佛滅度後。四依宏經。諸善知識開示。聞者得解。皆以聲塵爲經。若三藏十二部及諸祖語錄。皆以紙墨流傳。是色塵爲經。若但修觀相應。得證二空眞如。可稱法塵爲經。此方唯三塵得益者多。以眼耳意三根利故。若通途而論。他方諸佛國土。六塵皆可稱經。以淨土衆生。六根俱利故。如楞嚴會上二十五聖。各陳所入之門。門門皆通大道。十八界七大。无不是經。據此。可見悟者俱是。迷者俱非。是在當人之迷悟。何拘拘于文字爲哉。釋名竟。

二顯體六。一須辨體。二須知體。三別眞僞。四正出體。五略引證。六通異名。今一

體者主質之義。名旁是賓。體正是主。名乃假名。體是實質。體是名下之所詮。名乃體上之能詮。經中從始至終。无非能詮文字。意欲令人尋名得體。托能詮之文字。悟所詮之義理也。如因指見月。因筌得魚。若逐名迷體。如捉蛇尾。反遭其螫。世尊所以常爲弟子說筏喻也。卽如今題大方廣是理經名。圓覺是行經名。脩多羅了義是教經名。乃至全經字字。无非能詮之名。就茲名下。一一皆顯所詮之體。得此體已。方能全性起脩。以脩合性。復次釋名總詮三德。顯體別在法